

## **Franz Hohler - En abrochni Packig**

Lueg emal das Zmorgä aa und suech es richtigs brot  
und suech en Chruog voll Milch wo dampft und Konfi frisch und rot  
s'stöh Crispies da und UHT-Milch und irgendes Flöckligmisch  
es Schwedäknirsch es Blubundschluck und wo d'hiluegsch uf em Tisch...

...staht en abrochni Packig  
staht en ufgrissnä Sack  
staht en agfangni Schachtlä  
staht es halboffnigs Pack

Lueg emal diä Husfrau aa, wenss morgä am achti isch  
dr Maa isch gangä, dr Bueb isch i d'Schuel und sie sitzt a däm Zmorgätisch  
sie nimmt sich no ä Tassä Kafi, vom WC rueft diä Chlini  
sie zündt sich no ä Zigi aa und luegt no bis am nüüni...

...ufne abrochni Packig  
ufenen ufgrissnä Sack  
ufne agfangni Schachtlä  
ufenes halboffnigs Pack

Denn ruumt sie uf und gaht go poschtä, im Discount wiiter undä  
si lüpft diä Chlini is Chärelä inä und dräiht dänn ihri Rundä  
durnen Parcours us Suppä und Kafi und Riis und Nudlä und Wattä und Schoggi  
sie luegt uf d'Regal und s'chunt ihrä vor sie gsehch zwüschet Joghurt und Coggi...

...nur en abrochni Packig  
nur en ufgrissnä Sack  
nur en agfangni Schachtlä  
nur es halboffnigs Pack

Denn chunt sie häi und luegt i d'Zytig und gseht was alls isch gloffä  
Z'China chlöpfts und irgend noimä isch Gift is Wasser gloffä  
S'Parlamänt wett öppis machä nur was da hetts käi Schimmer  
Denn macht sie Zmittag und au sie weiss nid was, aber irgend es Ässä gits immer...

...usere abrochne Packig  
usme ufgrissnä Sack  
usre agfangne Schachtlä  
usme halboffne Pack

S'Zmittag verbii unds Gschirr i d'Maschine de Bueb gaht wieder i d'Schuel  
diä Chli gaht go schlafe derwilä ligt Mueter es Stündli uf e Liegestuel  
diä Chlini staht uf und de Bueb chunt häi etcetera und z'letscht chunt dä Maa  
und fragt sie wiä gohts de gohts nid guet und de gohts nid schlächt de isch sie eifach öppä  
dra...

...wiene abrochni Packig  
wienen ufgrissnä Sack

wiene agfangni Schachtlä  
wienes halboffnigs Pack.

Und vilicht ischs em Maa nid besser zmuert und sine Kollege au  
und vilicht isch sie wo sich grad eso fühlt nid die einzigi Frau  
mängisch dunkts mich diä ganzi Schwiiz sig e sonen Zmorgätisch  
und niemert isch no ganz und nüt isch me voll und au du du sälber bisch...

...wiene abrochni Packig  
wienen ufgrissnä Sack  
wiene agfangni Schachtlä  
wienes halboffnigs Pack.

Chli meh Freud, meh Muet, meh Saft, meh Gämp, meh Tröim, meh Liebi, meh Hoffnig, meh  
Göiss, weniger Soft Ice, meh würklechä Schmäz, meh Läbä, mached d'Fänschter uf, mached  
öppis mid euch, und midenand, lamped nid umänand...

...wiene abrochni Packig  
wienen ufgrissnä Sack  
wiene agfangni Schachtlä  
wienes halboffnigs Pack.